

D'Antiochia a Damascus

La Siria datti dapi almain 2300 onns

DA GUIU SOBIELA-CAANITZ

■ **Ils Stadis unids e la Gronda Bretagna han conquistà l'Irac. Ussa sa concentrescha l'attenziun sin in pajais limitrof, traversà d'in conduct d'ieli che collia ils champs da petroli da l'Irac cun il Mar mediterrann. La Siria (16 milliuns olmas) è situada tranter la Turchia che vulesse ir ina via democratica e l'Israel che sa fida be da sia atgna forza.** Senza la Siria na datti nagina stabilitad en il Proxim Orient. Quai sa era president Bush. Ma sa'l che la Siria, araba e musulmana sco l'Irac, sa differenziescha tuttina da ses vischin pli vast entras pliras nodas?

In'atgna cuminanza sper il Mar mediterrann

L'Irac, stadi artificial stgaffi da la Gronda Bretagna sunter l'emprima guerra mundiala, cumpiglia in intschess avdà dapi millennis dal pievel curd che furma almain 15% dals Iracais. Be 6% dals avdants da Siria èn Curds; i vivan ordaifer la Siria istorica, a l'ost dal flum Eufrat, per part sco fugitivs senza dretg da burgais. Era la realitad confessional da Siria sa differenziescha zunt da quella da l'Irac. Quest pajais quinta 5% cristians e 95% musulmans; 2/3 da quests professan la «schija», q.v.d. la furma d'islam derasada cunzunt en l'Iran. En Siria professan ils Nusairids da la costa mediterranea ina varianza da «schija» che deifitgescha Ali, cusrin e schender dal profet Muhammad; i furman var 10% da la populaziun siriana e la clica dominante dal stadi. Philip K. Hitti, istoricher american da derivanza libanaisa, ha scrit in manual oramai classic davart la Siria*; dals Nusairids rapporta'l: «I vegnan savens numnads 'Alauids'; lez num ha sa derasà sunter ch'els Franzos han organisà la regiun enturn Ladichija [sper il mar, G. S.-C.] ad in stadi 'al-aii'» (p. 172). Malgrad quest num sa differenzieschan ils Nusairids cleramain dals alevids da Turchia che mettan en dumonda plis cumandaments e scumonds da l'islam. Ils Nusairids furman la cuminanza la pli originala da Siria, entant che 80% dals Sirians professan il medem islam ch'els plis musulmans dal mund, quel da la «sunna» u tradiziun.



La terza citad da l'Imperi roman

La Siria è situada sin la via terrestre che colliava l'Egipta e l'Arabia, da vegl innà, cun las citads grecas da l'Asia minura. Ins pertschaiva ina Siria cun atgna identitad, tranter l'Eufrat ed il Mar mediterrann, gia cun il retg macedon Seleucos «il victur» (mort 280 a. Cr.), fundatur da bleras citads grecas, cunzunt Laodicea (oz Ladichija) ed Antiochia, sia chapitala e quella da ses successurs (oz Hatay en Turchia sper il cunfin da Siria). L'imperi da Seleucos tanscheva enfin en l'Asia centrala. En ils emprims tschientaners sunter Cristus era Antiochia la chapitala da la Siria romana e la terza citad da l'imperi, sunter Roma ed Alexandria d'Egipta. Il linguatg da cultura era grec, ma ins discurreva er arameic. Ad Antiochia han ils apostels entschavà ad «annunziar la buna nova dal Segner Jesus als Grecs (...). Là èn ils giuvnals vegnids numnads per l'emprima giada cristians» (Fatgs dals apostels, 11, 20 e 26). Il cristianissem è vegnì religiun da stadi pir en il quart secul. Il luxus dals ritgs stimulava blers da tscherner la vita monastica. 379 è in giuven d'Antiochia, numnà Gion, i sin ils culms enturn la citad, nua ch'el ha vivì dus onns sco eremit. 386 è'l vegnì spiritual. Hitti: «Sias

pregias eloquentas stigmatizavan la morala lucca ed il luxus. El truava quels che vegnivan ritgs entras violenza, engion, monopol ed usura e che restavan indiferents avant las suffrientschas dals paupers» (p. 102). Ins l'ha numnà «Crisostomos» («bucca d'aur»). El è mort 402 en exil e vegn oz venerà sco sontg. 540 ha l'armada persiana sblundregià e destrui Antiochia.

Arabs, cruschaders, Tircs, Franzos

Il segund temp d'aur da Siria, blier pli curt, è quel dal calif arab Muaujà (mort 680) e da sia dinastia enfin a 750. Da lur residenza a Damascus dominavan ils califs in vast imperi ch'è arrivà a tanscher enfin al flum Indus, las Pireneas e l'Ocean atlantic, cun l'entira costa sid dal Mar mediterrann. La Siria profitava dal commerzi aifer lez intschess. En ils tschientaners suandants è la vegnida adina pli arabisada aifer differents stadis musulmans; tranteren han cruschaders europeics dominà parts dal pajais. 1516-1918 ha la Siria, oramai araba, ma cun minoritads cristianas relevantas, fatg part da l'Imperi tirc. En il 19avel secul han paders catolics e gruppas protestantas fundà scolas e stamparias per ils cristians da Siria e Libanon. Hitti: «A

l'entschatta dal 20avel tschientaner è cumparida ina generaziun nova da scripturs, auturs, poets, publicists ed erudits (...). Il linguatg arab, fatg ruina da la vegliadetgna e deditgà ad emprimer patratgs tradiziunals, ha survegnì ina splendor frestga ed in'injectiun da vita nova che l'han adattà per exprimer las nianzas las pli finas dal patratg scientific e dals sentiments ils pli delicats» (pp. 240-241). Gist la pitschna minoritad cristiana da Siria (oz 9% da la populaziun) ha promovì e renovà il linguatg arab en moda decisiva. 1920 han ils victurs da la guerra mundiala incumbensà la Frantscha da gidar la Siria e Libanon a vegnir independents. Ins ha stgaffi in Libanon zavrà da Siria e dominà dals catolics, ma cun cunfins artificiali e sribblas musulmanas enturn il coc cristian. Damascus era pia separà da ses access al mar. «Ils Sirians (...) manegjavan che l'administraziun tenor incumbensa [da la Societad da las naziuns] sa distingua dal domini colonial en teoria pli che davaira. La controlla franzosa als pareva pli directa e pli odiusa che la tirca. Ils emprims trais cumissaris suprims (...) eran generals ch'avevan sa distinguid en la guerra mundiala. Sco adjuncts han els tschernì cunzunt uffiziers

cun experienza coloniala africana (...). I favurisavan il linguatg franzos sin donn e cust da l'arab (...). La revolta generala siriana da 1925 (...) ha durà enfin a l'atun 1927, cur che l'armada franzosa ha bumbardà Damascus cun bumbas ed artiglieria» (p. 243-244). Pir la segunda guerra mundiala ha pussibilità l'indipendenza da Siria e Libanon, commemorada da l'ONU dapi 1945.

Encunter l'Israel

1947-1948 han ils stadis arabs independents refusà la decisiun da l'ONU da stgaffir in stadi gidieu ed in arab en la Palestina administrada da la Gronda Bretagna. Era la Siria ha cumbattì l'Israel. Da las muntognas e planiras autas sur la vallada dal Jordan pudeva l'armada siriana bumbardar foppas israelianas. Perquai occupa l'Israel dapi 1967 lez culms sirians, ina sribla da 1176 km², cun pliras funtaunas d'aua, numnada per ebraic «ha Golan». Ma Damascus ha pudì cumpensar questa modesta perdita cun in pass da gigant vers la realisaziun d'in vegl siemi, numnadamain ina Siria gronda cun il Libanon (passa 4 milliuns olmas). La guerra civila che ha ruinà il Libanon ha dà a la Siria il pretext bramà per l'occupar ed intervegnir en sia vita politica. I n'ha betg gidà che patriarc Nasrallah Sfeir, manader da la Baseligia maronita libanaisa unida cun Roma, ha stigmatizà l'influenza siriana cun ina brev averta ils 6 da settember 2001. La Siria lubescha a l'organisaziun terrorista Hisbollah d'organisar attentats en l'Israel davent da Libanon. Da l'autra vart dependa ina part da Siria da l'aua da l'Eufrat che vegn giu dal vast lai artificial Ataturk en il Kurdistan tirc; quai pretenda in patg tranter la Turchia, Siria ed Irac. La superpussanza americana posseda trumfs sufficienti per promover in pasch da cumpromiss tranter la Siria, l'Israel e tschels pajais pertutgads. I dependa da president Bush e sia clica ch'i fetschian diever da lezzas premissas e na resguardian betg be finamiras a curta vista, sco l'elecziun presidenziala da november 2004, sfurzond si ina cunvegna zuppa che chaschunass malgistas, umiliaziuns, pitradad e violenzas novas.

*Philip K. Hitti, Syria. A Short History. Londra (Macmillan) 1959.

Malgrà che la Siria sa differenziescha da ses vaschins è ella sut squisch da l'America. KEYSTONE